

Тасаддуқ (Оламлар сарвари Мұхаммад алаіхиссаломга очиқ мактуб)



19:00 / 06.01.2022 1486

Үша кеча нима бўлса бўлди. (Қилмишимидан Аллоҳга тавба қилдим. Сизнинг шафоатингизга умид боғладим. Шу тавба ва умидим орқасида қайтиб оғзимга ичкилик олмадим, ё Расулуллоҳ.)

...Сўнг саҳар кирмасидан туриб ювиндим, кийимларимни алмаштириб, үша дўстимнинг хонасига чиқдим. (Ётоқхонада турардик.) “Маишат”дан кейин бўладиган одатдаги бошоғриқдан асар ҳам йўқ, руҳим фавқулодда жуда тетик эди. Кайфиятимда ҳам ўзим билмаган бир ёрқинлик бор эди.

Уч-тўрт киши бирга саҳарлик қилиб, оғиз ёпдик. Бир пас рўза масалаларидан сухбатлашдик. Кейин улар бомдод намози ўқигани чиқишиди. Мен эса, дўстимнинг ўрнига чўзилдим. Кўзим илинибди. Ўшанда илк бор сизни кўрдим, ё Расулуллоҳ!

Қоматингиз, сўзларингиз, атворингиз худди саҳобаларингиз таърифлагандек эди. (Бу таърифларни кейинчалик ўқиб билдим.) Ўшанда безовта эдингиз. Мен Сизни безовта қилган нарса кечаги ишларим эканини билиб турардим. “Кимдир биринчи кунги рўзасини бузибди, энди ҳаммамиз бошқатдан тутамиз”, дедингиз. Лекин үша бузғунчи ким эканини билиб туриб, айтмадингиз.

Ҳузурингизда уятдан ерга кириб кетгудек бўлдим. Сўнг уйғониб кетдим, дўстларим намоздан қайтишган экан.

Ўшанда илк бор поклик нелигини ҳис этдим, ё Расууллоҳ!

Уни менга Сиз англатиб кетдингиз, ё Расууллоҳ! (Кейинчалик яна бир марта жамолингизни насиб айлаб, неларнидир айтмоқчи бўлдингиз! Унга ҳам анчалар бўлди.)

Ҳамон ўша покликни, муборак жамолингизни соғинаман, ё Расууллоҳ, лекин Раббингиз дунё ҳавасларию журм-исёнларга ғарқ бандасига Ҳабибининг жамолини лойик кўрмаётир!

Ё Расууллоҳ, сизни соғиниш, жамолингизни бир бор туш кўриш – баҳт, қиёматда ёнингизда бўлиш эса минг чандон улуғ баҳт...

Раббимизнинг бизга онажонларимиздан ҳам меҳрибонроқ эканини айтгансиз. Дарҳақиқат, биз Уни шундай топдик. Ахир, бўлмаса, бир кун олдин, Рамазондек муборак ойнинг илк кунида катта-катта гуноҳларни содир этиб турган бир бандасини эртасигаёқ, Исломнинг остонасидан ҳатлар-ҳатламас, сахарлик билан сийлармиди, Расулининг жамолини изҳор этармиди?!

Ё Расууллоҳ, Сизга салавот ва саломлар йўллаймиз, Сизга салому салавот йўллаш асносида Сизга лойик уммат бўлишимизда Аллоҳдан мадад тилаймиз.

Ё Расууллоҳ, Сизни қиёмат кунида мақтовли мақомда тирилтиришини, Ҳавзи Кавсар бўйида бизни сиз ила дийдор кўриштиришини сўраймиз...

Тушларимга кириб туринг, ё Расууллоҳ!..

Бир умматингиз

Абдугафур Искандар